

# Sekitar JPA

Kupasan Perjalanan Transformasi JPA

Edisi 9: 1—15 Jun 2015



## MENARIK DI DALAM

- Perasmian Program DPA INTAN Tahun 2015 .....2
- Perlawanan Bola Sepak JPA VS Super Lawak FC .....3
- Seminar Kesihatan dan Kecergasan Penjawat Awam 2015 .....6



## MAJLIS PENYAMPAIAN BIASISWA YANG DI-PERTUAN AGONG SESI 2015/2016

9 Jun 2015, ISTANA NEGARA - Yang di-Pertuan Agong Tuanku Abdul Halim Muadzam Shah hari ini berkenan mengurniakan Biasiswa Yang di-Pertuan Agong (BYDPA) 2015 kepada 11 orang penuntut institusi pengajian tinggi yang akan melanjutkan pelajaran ke peringkat Sarjana dan Doktor Falsafah (Ph.D).

Biasiswa ini diperkenalkan bagi mengiktiraf kebolehan luar biasa seseorang calon, di samping memberi peluang untuk mereka melanjutkan pengajian di peringkat pasca ijazah (Sarjana dan Ph.D) di dalam dan di luar negara.

Kesemua penerima biasiswa yang diuruskan oleh Jabatan Perkhidmatan Awam (JPA) itu merupakan penuntut dalam bidang sains dan teknologi yang akan melanjutkan pengajian di universiti tempatan dan luar negara. Mereka akan menerima kadar bayaran eluan sara hidup 50 peratus lebih tinggi daripada kadar biasa Biasiswa Persekutuan.

Selain itu, penerima biasiswa juga tidak terikat untuk berkhidmat dengan kerajaan Malaysia dan bebas

memilih untuk berkhidmat di sektor awam atau swasta namun diwajibkan pulang ke tanah air setelah menamatkan pengajian.

Pengurniaan biasiswa itu bukan sekadar mengiktiraf kecemerlangan penuntut dalam bidang akademik tetapi juga bagi mereka yang berkebolehan dalam penghasilan kerja-kerja kreatif dan inovasi serta mendapat tempat di universiti terkemuka di dalam dan luar negara.

Sehingga tahun 2014, seramai 107 orang penerima telah ditaja iaitu 53 orang peringkat Sarjana manakala 54 orang lagi Ph.D. Manakala, pada tahun ini (2015) penambahan sebanyak 12 penerima telah dipilih untuk menerima biasiswa ini dan menjadikan seramai 119 orang penerima telah ditaja.

Pelajar yang akan memasuki alam pengajian dan sedang menduduki sesi pengajian diharap dapat memanfaatkan biasiswa yang diberikan dengan mencapai kejayaan yang cemerlang kerana biasiswa ini hanya diberikan kepada mereka yang betul-betul layak.



## PERJUMPAAN YAB PERDANA MENTERI BERSAMA WARGA JABATAN PERDANA MENTERI



Pada 1 Jun 2015, telah berlangsung Perjumpaan YAB Perdana Menteri Bersama Warga Jabatan Perdana Menteri. Dalam ucapan beliau, Datuk Seri Najib Tun Razak menegaskan supaya penjawat awam memberikan fokus sepenuhnya kepada pelaksanaan Rancangan Malaysia Ke Sebelas (RMK-11) dan tidak membiarkan perkara lain mengganggu perhatian mereka. Dalam ucapan beliau lagi, pelaksanaan RMK-11 yang berteraskan prinsip propertumbuhan, prorakyat, properniagaan, pembangunan lestari dan pembinaan bangsa merupakan lonjakan terakhir sebelum Malaysia memasuki gelanggang sebagai negara berpendapatan tinggi. Majlis perhimpunan ini turut dihadiri oleh Menteri-Menteri di Jabatan Perdana Menteri, Ketua Setiausaha Negara, Tan Sri Dr. Ali Hamsa, Ketua Pengarah Perkhidmatan Awam, Tan Sri Mohamad Zabidi Zainal serta pegawai-pegawai kanan Kerajaan.

Beliau berkata, Kerajaan mesti mengamalkan dasar yang merangsang kadar pertumbuhan tinggi atau sederhana tinggi kerana pertumbuhan yang kurang baik akan mengurangkan peluang pekerjaan selain menyukarkan pembahagian kekayaan secara lebih seimbang antara kumpulan etnik dan wilayah. Tambahnya lagi, perniagaan yang maju dan pelaburan yang bertambah akan meningkatkan peluang pekerjaan dan penjanaan kekayaan menjadi lebih mudah. Selain itu, Kerajaan juga perlu mengamalkan dasar yang dapat mengukuhkan perpaduan dengan berpaksikan kepada prinsip-prinsip 1Malaysia. Pelaksanaan RMK-11 pada masa yang sama berteraskan prinsip mesra alam sekitar atau pembangunan yang lestari.

*“Never doubt that a small group of thoughtful, committed, citizens can change the world.  
Indeed, it is the only thing that ever has.” – Margaret Mead*

## PERASMIAN PROGRAM DPA INTAN TAHUN 2015



Majlis Perasmian Program Diploma Pascasiswa Pengurusan Awam (DPA) INTAN 2015 telah disempurnakan oleh Tan Sri Dr. Ali Hamsa, Ketua Setiausaha Negara (KSN) pada 2 Jun 2015 di Auditorium, INTAN Bukit Kiara. Majlis ini turut dihadiri Tan Sri Mohamad Zabidi Zainal, Ketua Pengarah Perkhidmatan Awam serta Ketua-ketua Setiausaha Kementerian dan Ketua Pengarah.

Dalam amanat beliau, Tan Sri KSN menegaskan bahawa para peserta Kadet PTD merupakan yang terpilih di kalangan berpuluhan ribu orang yang memohon. Justeru itu, mereka perlu menjalani kursus setahun dengan bersungguh-sungguh dan tidak hampakan Negara. Peserta Kadet PTD juga perlu membaca dan menghayati agenda dan program Rancangan Malaysia ke-11 kerana mereka yang akan melaksanakan agenda setelah tamat berkursus tahun hadapan.

Seramai 302 orang peserta Kadet PTD telah terpilih untuk menyertai Program DPA pada tahun ini.



## LAWATAN JPA4U KE ROYAL FLORIA PUTRAJAYA 2015

Pada 2 Jun 2015, JPA telah mengadakan Lawatan JPA4U ke Royal Floria Putrajaya di Anjung Floria, Presint 4, Putrajaya. Lawatan ini dihadiri Tan Sri Mohamad Zabidi Zainal, Ketua Pengarah Perkhidmatan Awam. Turut hadir sama dalam lawatan ini ialah Puan Sri Asmahan Ismail, Pengerusi PUSPANITA Cawangan Kecil JPA, serta para pegawai JPA seramai 60 orang. Delegasi JPA telah disambut oleh Tan Sri Aseh Che Mat, Presiden Perbadanan Putrajaya dan isteri.

Delegasi JPA telah meluangkan masa melawat kawasan pameran termasuk taman-taman pameran yang dikendalikan oleh kementerian dan agensi Kerajaan. Tema Royal Floria Putrajaya pada tahun ini ialah 'Alunan Pancarona' yang menampilkan bunga lili sebagai tema utama. Bunga lili menjadi pilihan utama kerana mempunyai pelbagai spesies yang menghasilkan warna yang indah dan menarik. Penyertaan peserta antarabangsa pada tahun ini melebihi 50 orang yang terdiri daripada pereka bunga dan arkitek landskap dari Australia, Kemboja, Kanada, China, Hong Kong, India, Itali, Jepun, Oman, Singapura, Korea Selatan dan New Zealand. Buat pertama kalinya juga, Taman Musim Bunga dan Taman Musim Sejuk dipamerkan di negara ini, sekali gus memberi simulasi taman Eropah pada musim sejuk berserta salji.

## PERLAWANAN BOLA SEPAK JPA VS SUPER LAWAK FC

PUTRAJAYA, 3 Jun 2015 – Jabatan Perkhidmatan Awam (JPA) dengan kerjasama Jabatan Kebajikan Masyarakat dan Pasukan Super lawak FC menganjurkan Majlis Perlawanan Amal Bola Sepak JPA dengan Super Lawak FC yang bertujuan untuk mengutip sumbangan buat warga golongan kurang upaya di bawah jagaan Pejabat Kebajikan Masyarakat Cawangan Putrajaya. Majlis pada kali ini berdasarkan pendekatan sinergi melibatkan kerjasama JPA dan Rumah Artis Management dengan sokongan agensi jabatan sektor awam dan swasta serta sukarelawan RELA setempat.

Majlis ini juga merupakan satu inisiatif gerak padu *Coporate Social Responsibility* Kelab Sukan dan Kebajikan di bawah panji JPA4U dalam memacu dan memupuk perkhidmatan awam ke arah yang lebih prihatin. Kolaborasi yang julung kalinya diadakan bersama selebriti artis dan JPA adalah bagi membuktikan rasa semai kasih sayang dan kebertanggungjawaban terhadap insan yang memerlukan seperti golongan istimewa.

Antara selebriti yang hadir adalah Kumpulan Sepahtu, Yassin SYJ, Rahim, Ajak Shiro dan ramai lagi. Selain beramal, perlawanan ini adalah bagi memupuk kerjasama erat yang muhibah antara penjawat awam bersama selebriti artis. Kutipan sebanyak RM 6945.20 dapat dikumpulkan dan diserahkan pada warga OKU di Putrajaya.



## LAWATAN DELEGASI INDONESIA KE JPA



Lawatan Delegasi Lembaga Administrasi Negara (LAN), Republik Indonesia ke Jabatan Perkhidmatan Awam (JPA) telah diadakan pada 4 Jun 2015. Lawatan ini dihadiri seramai 39 orang pegawai Kerajaan Republik Indonesia yang sedang mengikuti latihan kepimpinan di *National Institute of Public Administration* (NIPA), Republik Indonesia. Tujuan lawatan diadakan ialah untuk memahami aspek pengurusan sumber manusia Perkhidmatan Awam Malaysia dan transformasi yang dilaksanakan serta mempelajari amalan terbaik dalam pengurusan sumber manusia dan inovasi perkhidmatan awam.

Dalam perutusan Pengerusi, Dato' Yeow Chin Kiong, Pengarah Bahagian Pasca Perkhidmatan telah berkongsi mengenai agenda transformasi yang telah diperkenalkan oleh Ketua Pengarah Perkhidmatan Awam sejak 2013, menerangkan tentang kemajuan proses transformasi yang telah disebarluaskan ke Kementerian, Agensi dan Negeri selain inisiatif-inisiatif transformasi yang telah dilaksanakan oleh JPA.

Ketua Delegasi LAN, Republik Indonesia, Puan Kania Damayanti turut berkongsi serba ringkas mengenai NIPA kepada wakil pegawai JPA yang hadir. Secara keseluruhannya, lawatan korporat ini membolehkan para pegawai dari dua buah Negara untuk berkongsi pandangan dan idea baharu bagi memastikan perkhidmatan awam masing-masing kekal relevan.

## PERASMIAN MESYUARAT AGUNG TAHUNAN PPTD 2015



Mesyuarat Agung Tahunan Persatuan Pegawai Tadbir Diplomatik (PPTD) 2015 telah diadakan di Dewan Sri Siantan, Perbadanan Putrajaya pada 5 Jun 2015. Program ini dirasmikan oleh Tan Sri Dr. Ali Hamsa, Ketua Setiausaha Negara (KSN). Mesyuarat ini turut dihadiri Tan Sri Mohamad Zabidi Zainal, Ketua Pengarah Perkhidmatan Awam dan Dato' Seri Zainal Rahim Seman, Ketua Pengarah MAMPU juga merangkap Presiden PPTD.

Tema Mesyuarat Agung Tahunan PPTD pada tahun ini ialah "Persatuan Kita, Tanggungjawab Kita." Dianggarkan seramai 500 orang ahli PPTD telah hadir. Dalam ucapan perasmian beliau, Tan Sri KSN berpesan kepada PPTD agar menyesuaikan diri dengan kehendak dan keadaan semasa yang mahukan penjawat awam untuk berfikir *out of the box* dan melaksanakan program menggunakan *National Blue Ocean Strategy*. PPTD juga digesa untuk menyahut agenda pembangunan Negara melalui sokongan dan pelaksanaan Rancangan Malaysia ke-11. Tan Sri KSN mengakhiri ucapan beliau dengan harapan agar PPTD kekal relevan dalam perjalanan arus pembangunan dan dapat meneruskan kesinambungan menyumbang kepada Negara.

## MESYUARAT KPPA BERSAMA KETUA SETIAUSAHA KEMENTERIAN DAN SETIAUSAHA KERAJAAN NEGERI BIL.2/2015

Mesyuarat Ketua Pengarah Perkhidmatan Awam (KPPA) Bersama Ketua Setiausaha Kementerian (KSU) dan Setiausaha Kerajaan (SUK) Negeri Bilangan 2 Tahun 2015 telah diadakan di Klana Resort Seremban, Negeri Sembilan pada 8 Jun 2015.

Majlis Ramah Mesra bersama YAB Dato' Seri Utama Haji Mohamad haji Hasan, Menteri Besar Negeri Sembilan diadakan sebelum mesyuarat bermula. YAB Dato' berkongsi ilmu dan nasihat kepada penjawat awam khususnya KSU untuk membantu Kerajaan Negeri dalam program pembangunan era baru. YAB Dato' turut memberi pererangan mengenai beberapa pencapaian Negeri Sembilan yang telah diperoleh selama lima tahun kebelakang ini.

Tan Sri Mohamad Zabidi Zainal, KPPA dalam Mesyuarat turut menyampaikan amanat beliau berhubung isu-isu dan usaha penamaian dalam perkhidmatan awam. Pertentangan kertas kerja bertajuk 'Malaysia Vision Valley' telah disampaikan oleh SUK Negeri Sembilan selain Pelan Transformasi Kementerian seperti Kementerian Kewangan, Kementerian Perdagangan Dalam Negeri, Koperasi dan Kepenggunaan serta Kementerian Sains, Teknologi dan Inovasi.



*"Teamwork is the ability to work together toward a common vision. The ability to direct individual accomplishments toward organizational objectives. It is the fuel that allows common people to attain uncommon results." - Andrew Carnegie*



## MAJLIS INTERAKSI KPPA BERSAMA PESERTA PROGRAM DIPLOMA PASCASISWAZAH PENGURUSAN AWAM (DPA) 2015

Majlis Interaksi Ketua Pengarah Perkhidmatan Awam (KPPA) bersama-sama Peserta Program Diploma Pascasiswazah Pengurusan Awam (DPA) 2015 telah diadakan pada 9 Jun 2015 di INTAN, Kampus Bukit Kiara. Program ini diadakan untuk memberi peluang kepada Peserta DPA untuk mendengar amanat daripada Tan Sri KPPA di samping bertanyakan soalan dan nasihat.

Program DPA merupakan salah satu syarat lantikan ke dalam Perkhidmatan Tadbir dan Diplomatik (PTD). Peserta perlu hadir dan lulus dengan jayanya Program DPA INTAN dan Program DPA Universiti Malaya sebelum dilantik sebagai Pegawai PTD. Kolaborasi strategik bersama UM bagi Program DPPA merupakan salah satu langkah *quick wins* dan titik permulaan INTAN ke arah mendapatkan akreditasi penuh bagi Program DPA. Bermula pada tahun 2015, INTAN akan melaksanakan sepenuhnya Program DPA yang mendapat akreditasi penuh daripada MQA. Pada tahun ini, seramai 302 orang telah terpilih untuk mengikuti Program DPA.

Dalam amanat beliau, Tan Sri KPPA berpesan agar para peserta dapat mempelajari segala kemahiran dan ilmu yang disampaikan termasuk *soft skills* dengan sebaiknya bagi memastikan hasrat pucuk kepimpinan tertinggi negara untuk melahirkan PTD yang mempunyai sahsiah diri yang terbilang dan disegani. Tan Sri KPPA juga berharap agar semua peserta akan dilantik sebagai Pegawai PTD di penghujung Program DPA ini nanti.

## D-DUOS DAY: SUPER MOM & GROUP DYNAMIC

Program 'D-Duos Day & Group Dynamics telah berlangsung di INTAN, Bukit Kiara pada 9 Jun 2015. Program anjuran Biro Pendidikan ini telah dirasmikan oleh Puan Sri Asmahan Ismail selaku Pengurus PUSPANITA Cawangan Kecil, JPA. Seramai 100 peserta terdiri dari ibu iaitu para pegawai JPA dan anak-anak mereka menghadiri program tersebut.

Objektif program ini diadakan adalah untuk meningkatkan kemahiran anak-anak bagi ibu yang bekerja dan meningkatkan komunikasi yang berkesan antara ibu dan anak. Selain itu, peserta juga dapat memahami dan mengamalkan gaya hidup yang sihat dan sejahtera, serta cara untuk mengendalikan stres di tempat kerja dan di rumah.



*"Healthy citizens are the greatest asset any country can have." – Winston S. Churchill*

## SEMINAR KESIHATAN DAN KECERGASAN PENJAWAT AWAM 2015

Pada 11 Jun 2015, telah berlangsungnya Majlis Perasmian Seminar Kesihatan & Kecergasan Penjawat Awam 2015 bertempat di Auditorium Putra, Bangunan Putra Canselor Universiti Putra Malaysia. Seminar yang merupakan anjuran bersama oleh Persatuan Pekerja Malaysia (YAPEM) dan Pusat Sukan Universiti Putra Malaysia ini telah dirasmikan oleh Ketua Pengarah Perkhidmatan Awam, Tan Sri Mohamad Zabidi Zainal. Kerjasama antara YAPEM dan UPM ini merupakan satu langkah kesedaran ke arah memupuk amalan dan cara hidup sihat khususnya kepada warga penjawat awam.

Dalam ucapan Tan Sri Mohamad Zabidi Zainal, beliau menyatakan bahawa faktor kesihatan tidak boleh diabaikan malah perlu dititikberatkan sebagai salah satu faktor utama dalam proses pembangunan negara. Hal ini kerana, merujuk kepada Health Facts 2014 Kementerian Kesihatan Malaysia, dianggarkan lebih kurang 2.11 juta pesakit telah didaftarkan ke hospital kerajaan akibat daripada pelbagai jenis penyakit. Oleh sebab itu, memiliki taraf kesihatan yang baik bukan sahaja perkara yang penting malah mampu meningkatkan taraf sosio-ekonomi negara serta meningkatkan proses pembangunan negara.



## PROGRAM EKSPRESI TRANSFORMASI: “RAMADAN YANG DIRINDU”



Pada 12 Jun 2015, telah diadakan Program Ekspresi Transformasi yang bertemakan “Ramadan Yang Dirindu” di Auditorium JPA, Aras 4, Blok C1, Kompleks C, Putrajaya. Program ini merupakan program kerohanian yang diadakan bertujuan untuk berkongsi ilmu kepada warga JPA. Program dianjurkan oleh Kelab JPA dalam usaha untuk memberi kesedaran kepada umat Islam bagi menyambut bulan Ramadhan yang bakal tiba. Program sebegini juga dapat membangkitkan semangat dan kesungguhan diri dalam setiap penjawat awam untuk melaksanakan Rukun Islam yang Ketiga.

Program dimulakan dengan bacaan Asma Ul Husna, bacaan ayat-ayat suci Al-Quran, selawat, bacaan sajak Ramadhan dan persembahan Qasidah oleh kumpulan Nur Ahli Badar. Majlis ini kemudian diserikan lagi dengan tazkirah Ramadhan yang disampaikan oleh Dato’ Ustaz Badli Shah Alauddin. Turut hadir memberikan sokongan terhadap program ini ialah Ketua Pengarah Perkhidmatan Awam, Tan Sri Mohamad Zabidi Zainal dan pegawai pengurusan atasan.

## KONVENSYEN KREATIF DAN INOVATIF (KIK) JABATAN PENJARA MALAYSIA



Pada 13 Jun 2015, telah berlangsung Konvensyen Kreatif dan Inovatif (KIK) Jabatan Penjara Malaysia Tahun 2015 di Akademi Koreksional Malaysia, Pulau Langkawi. Konvensyen ini turut menjemput Dato’ Jalil Marzuki, Timbalan Ketua Pengarah Perkhidmatan Awam (Pembangunan), Jabatan Perkhidmatan Awam untuk merasmikan penutupan Konvensyen KIK.

Sebanyak 12 pasukan mewakili zon masing-masing telah menyertai Konvensyen KIK pada kali ini. Pasukan Karisma dari Penjara Wanita Kota Kinabalu telah dinobatkan Johan bagi Kategori Pengurusan sementara Pasukan i2 dari Penjara Taiping telah menjadi Johan bagi Kategori Teknikal. Menurut Ketua Juri, Dr. Nor Asyikin Salleh dari Institut Aminuddin Baki, komitmen dan sokongan yang diberikan oleh pihak atasan serta ahli-ahli pasukan amat tinggi sekaligus memberikan semangat kepada pasukan yang bertanding.

Dato’ Jalil Marzuki, dalam ucapan penutup beliau mencadangkan agar di masa akan datang, Jabatan Penjara Malaysia dapat memperkenalkan inovasi yang memberikan manfaat bukan sahaja kepada pelanggan utama, iaitu para banduan, namun juga kepada ahli keluarga mereka.

## RAMADAN HEALTH TIPS

- ◆ *Eat suhoor just prior to dawn.*
- ◆ *Avoid gorging yourself when breaking the fast.*
- ◆ *Have a healthy and balanced dinner.*
- ◆ *Sip on water throughout the evening. Aim for 8 glasses by bedtime.*

Source: <http://islam.about.com/>

## 12 HABITS OF EXCEPTIONAL LEADERS

Great leadership is indeed a difficult thing to pin down and understand. You know a great leader when you're working for one, but even they can have a hard time explaining the specifics of what they do that makes their leadership so effective. Great leadership is dynamic; it melds a variety of unique skills into an integrated whole.



Below are **12 essential behaviors** that exceptional leaders rely on every day. Give them a try and you can become a better leader today.

1. Courage
2. Effective Communication
3. Generosity
4. Humility
5. Self-awareness
6. Adherence to The Golden Rule – treat others as you want to be treated
7. Passion
8. Infectiousness
9. Approachability
10. Accountability
11. Sense of Purpose
12. Wisdom to Know When to Use All the Traits

Source: <http://www.entrepreneur.com>



### JABATAN PERKHIDMATAN AWAM

Blok C1-C3, Kompleks C, Pusat Pentadbiran Kerajaan Persekutuan, 62510 W.P. Putrajaya, Malaysia | Telefon: 603 8000 8000

Sumbangan Berita: Warga JPA | Penerbitan: Pasukan Komunikasi | Percetakan: Unit Dokumentasi, JPA